

Cherta de identité, Fascia é a una per l lingaz standard

Sun chest tem l intervent dla Procuradoura Cristina Donei a la Festa dl Popul Ladin



Cristina Donei à rejoné dla cherta de identité a la festa dl popul ladin a Ciasel Prösel.

Al é con gran plaje che ie tole la parola a chesta festa dl popul ladin, simbol dla unité storica, culturala, identitaria y linguistica de nosta Ladinia.

Duc nosautri ladins on combatù acioche noster rajies antiches y originals vegne reconosciudes daite da noster provincies, da nosta region y da nost stat, ma con gaissa y determinazion sonse stac bogn de se fé conesse ence foravia dai confins nazional. L'Union Generela di Ladins dles Dolomites é la cherta de identité ti confront de l'Europa y dl mond: t'Union Generela messessanse dassen reconesce chela associazion che reprejenteia duc i ladins dl Sela.

Cherta d'identité che encuei on l met de avei ence concretamente sciche ladins. Y apontin te chesta ocajon volessi porté dant valch reflexion en referiment a la poscibelté che i ladins fascians a arjont, tres la Provincia de Trent, de podei avei na cherta d'identité damanada, sciche i saon, ence da la Provincia de Bulsan per

Gherdeina y la Val Badia. La provincia de Trent ti à damané chest document al govern talian con chela de ti dé atuazion al decret legislativo n. 178 di 4 de auril dl 2006 che integreia les normes de atuazion prevedudes dal DL 592/93.

Le pense che les discussions valch outa ence busientes, vegnudes fora ajache i fascians a chiri fora la varianta fasciana standard sciche lingaz per sie document, ae abù ence si resultac positif. L'argoment dla cherta de identité à envié via discussions y confroncs vifs y soc da pert de dutes noster comunanzes y al nes à oblighé a se fé n pensier ciamò plu general sun la gran oportunité che podessa ne sporje l Ladin Standard, laoré y volù da les istituzions scientifices ladines, apontin dal ofize linguistich dla Generela (Spell) dant da n bon puec de agn, con chela de ti sporje a nost popul n lingaz scrit unitar da adoré sciche segn de unité tl confront anter nosautri y ence y souraldut coi teritores foradeca. Te chesta ocajon volessi donca recordé da nuef la posizion tutta ofizialmente dal president dl Comprenjore ladin de Fascia tla Lia di Comuns ladins de fauré de chest ann. Canche l president à sapù che ence la Provincia de Bulsan essa volù scomencé via l iter per avei na cherta de identité ladina – te chest cajo con trei lingaz – al tost mostré sia intenzion de fé n vare endò y de ester a la leta per chiri fora l lingaz standard sce ence i ladins dl Südtirol essa cernù chesta soluzion. L Comun General, ciamò de plu te chest moment storich olache al pieia via con gaissa nueva, se met a la

leta de duc i autri ladins dl Sela, damanan n confront per abiné fora la soluzion mioura, che tegne dassen adum duc i ladins te n lingaz comun.

Te chest simbol tant emportant de n document identitar messessa vigni ladin se reconesce y se fé reconesce sciche pert de n popul stolz de avei rajies comunes, sceben che te na polinomia linguistica che fej vigni idiom rich y original. La gran endesfida che nos fascians se on tout su tla reforma istituzionala dl Comun General é de jì sourafora i enteresc de ciampañil per tegni adum y laoré adum. Le crieie che ence a nivel interladin sie la endesfida che i on dant da nos dassen chela de laoré deberieda per l ben comun a nivel identitar y linguistich. La ocajon dla cherta de identité fossa donca n vare simbolich de gran emportanza che ti dassa speranza y forza ence ai ladins de Fodom y Ampez che podarà, con nost aiut, se reconesce te chest document. Sce i fossan bogn de sté adum te chest vare nuef sciche i sion stac adum tla istituzion dl Comun General, podessanse dassen ester stolz de nosta partegnuda. Fascia à semper cherdù te chesta istituzion, reconesciuda ence da la Provincia de Trent. Le creie che i ladins dl Sela ne posse nia jì inant un per vers. Le veide badioc, gherdeines, fodoms, ampezans y fascians sciche i colours vifs, desvalifs y luminousc de n gran caleidoscop che pò ester marevueious demé sce al tol ite te sia carateristica duc chisc colours.

Cristina Donei, Procuradoura dl Comun General de Fascia

A B C: QUIZ sun la Ladinia

En gaujion dla Festa dl Popul Ladin à podù i ghesc tò pert al bel juech y vence de bie pesç. Porvede fora sen ence vos a ciasa tant che i saveis, fejede spo na crousc sun la letra A, B o C che corespon a la drete resposta.

1. Chi él pa che met a jì l LadiniaTour y la rassegna di cors di mutons Ciantede con nos?
A - La Union Generela di Ladins dles Dolomites
B - La RAI da Bulsan
C - Chi che à diaorela y é bon de l fé

2. Chi é pa Scedola?
A - L fi de n marangon da Vich
B - N ziaplador de Urtijei
C - L protagonist de caricatures sun la "Usc di Ladins"

3. Cie é pa l'Aurona?
A - N gran vent
B - N luech dla lijenda che ascon n tesour
C - Na gran ela dles conties vegnuda tla Val Badia da Valdaora ca

4. Ciun gran pitour dess avei abù sies rajies te Anpezo?
A - Jakob Zanusi
B - Tiziano Vecellio
C - Rembrandt

5. Can é pa nasciuda la bandiera ladina?
A - Do la prima gran vera, dl 1920
B - Canche al é vegnù metù su la provincia de Bulsan, dl 1927
C - Canche al é passé l prum auto sun l Stradon dles Dolomites, dl 1909

6. Cie é pa Zent Ladina Dolomites?
A - N moviment politich ladin do l 1945
B - N grup de ampezans en vacanza
C - I Conseis dles Unions di Ladins y dla Union Generela

7. Olà y can éla pa vegnuda enaudea la prima sentadoia dla Talia?
A - Te Fascia sun Rodela dl 1948
B - Te Anpezo, sul Col Galina dl 1950
C - Tla Val Badia sun Col Alt dl 1946

8. Daniel Zen (1584-1628), preve da Vich, é diventé
A - misionar tla Cina
B - eremit tl Sudan
C - prinç vescul dl Sacher Roman Imper de Nazion Todescia

9. Cie é pa la "Cesa de Jan" steda denant che diventé la senta dl Istitut Cultural Ladin per i comuns de Col, Fodom y Anpezo?
A - La senta dl'amministrazione dles mineores de Fursil
B - La ciesa de n latin lover con rajies aunejanes
C - La senta dles Regoles da Col

10. Da cie se tem pa les bregostanes?
A - Da l'ega
B - Da les saites
C - Dai cians

11. Olà él pa vegnù descorsi les testimonianzes archeologiches plu vedles di raion dolomitich?
A - Sun Plan de Frea, n sit mesolitich dl 7000 dant Crist
B - A Sotciastel, n sit dl Bron Mesan de entourn l 1700 dant Crist
C - Sun Col di Pigui, n sit dl temp dl Fer dl V centenè dant Crist

12. Chi fova pa Catarina Lanz?
A - La jormana de Margarethe Maultasch, che à arpé Ciasel Tirol
B - Na eroina che à combatù contra i saudés franzeisc
C - La cuega dl hotel "Miramonti" de Cortina

13. Ciun fova pa l sourainom de Tita Piaz de Pavarin, l gran alpinist fascian?
A - L Salvan di Cadenac
B - Chel malan de Tita
C - L diaol dles Dolomites

14. Chi à pa scrit la prima gramatica dl gherdeina?
A - Ujep David Insam, dl 1806
B - Micurà de Rù, dl 1833
C - Ujep Vian, dl 1864

15. Doi comuns dles valedes de Gherdeina, Badia, Fascia, Fodom y d'Anpezo termeneia demé con comuns ladins dolomitichs. Ciugn?
A - Mazin y Corvara
B - La Val y Corvara
C - Sëlva y Mazin

16. Da di su i creps dal plu aut al manco aut: ciuna é pa la drete secuenza?
A - Marmolea, Tofanes, Zuita, Boé, Saslonch
B - Marmolea, Cristallo, Tofanes, Zuita, Saslonch
C - Marmolea, Zuita, Saslonch, Cristallo, Boé

17. Co à pa inom l ruf Cordoul tl toch che passa fora per Fodom?
A - Ru de Pordou
B - Ru Freit
C - Gran lèga

18. Co ti vègnel pa dit ai juesc ziplés tl legn, tìpics dla valeda de Gherdeina?
A - Zipladures
B - Zipla
C - Chiena

19. Cie ti vègnel pa dit ai meinacres ampezans?
A - Ciamorc
B - Rehli
C - Schirates

20. Cie él pa vegnù damané con l referendum tegnù t'Anpezo y te Fodom dl 2007?
A - De mete su na scola paritetica ti comuns de Col, Fodom y Anpezo
B - De podei jì endò con la Provincia de Bulsan
C - De mete su n stat independent ladin

21. Cie vuelel pa di "jì en vila", o "jì par vila" o "jì a vila"?
A - Jì a compré ite te zité
B - Jì tla vila de Seres a Longiarù
C - Jì a se la ciacolè tla ciasa de amic

22. Olà jiva pa la Strada de la Vena?
A - Da Bulsan enchin t'Anpezo
B - Da Fodom enchin tla Val Badia
C - Da Laion a Sëlva

23. Cie é pa la carateristica dla scola paritetica dla Val Badia y de Gherdeina?
A - Che scoleres y scolés vegn tratés duc valif y unfat
B - Che al vegn fat n numer de ores valif de todesch, ladin y talian
C - Che al vegn fat n numer valif de ores de lezion per todesch y per talian y una o doos ores de ladin

24. Joachina Mussner da Costa, maestra da Santa Cristina, é steda
A - la prima ela ombolta tla provinza de Bulsan
B - la prima presidenta dla Union Generela
C - la prima hoteliera de sie paisc

25. La Cesa di Ladins é la senta de
A - chi che se à declaré ladins pro la cumpèda dla jent
B - la Union Generela di Ladins
C - la Lia di Comuns Ladins

